



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGKAL KEEMPAT
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Perkembangan Perancangan Projek
Pembinaan Klinik Kesihatan Baharu dan
Pejabat Kesihatan Daerah Kulai**
- *YB. Puan Teo Nie Ching (Kulai)*

(Halaman 1)

MALAYSIA
KAMAR KHAS
PARLIMEN KEEMPAT BELAS
PENGGAL KEEMPAT
MESYUARAT KEDUA

Isnin, 6 Disember 2021

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

**Perkembangan Perancangan Projek
Pembinaan Klinik Kesihatan Baharu dan
Pejabat Kesihatan Daerah Kulai**

2.34 ptg.

Puan Teo Nie Ching [Kulai]: Terima kasih, Tuan Yang di-Pertua. Tuan Yang di-Pertua, daerah Kulai hanya mempunyai dua buah klinik kesihatan sahaja iaitu Klinik Kesihatan Kulai Besar dan Klinik Kesihatan Kulai Bukit Liki. Klinik Kesihatan Kulai Besar dan Klinik Kesihatan Kulai Bukit Liki merupakan klinik yang sering warga Kulai mendapatkan rawatan. Kedua-dua klinik kesihatan ini tidak lagi mempunyai kawasan untuk tujuan naik taraf dengan penambahan bangunan baharu.

Perkembangan kawasan industri dan ekonomi serta kawasan perumahan yang baharu menyebabkan telah berlakunya peningkatan penduduk secara mendadak di daerah Kulai. Perkara ini telah menyebabkan kedua-dua buah klinik kesihatan ini tidak dapat lagi menampung jumlah pengunjung dan keadaan ini memberi kesan yang serius kerana tidak dapat menerima perkhidmatan rawatan kesihatan pada tahap terbaik. Justeru, satu klinik kesihatan yang baharu perlu ada di Senai kerana di kawasan tersebut hanya mempunyai klinik desa sahaja sedangkan kawasan ini sudah mengalami kepesatan pembangunan dan kepadatan penduduk.

Selain itu, Pejabat Kesihatan Daerah Kulai tidak mempunyai bangunan pejabatnya sendiri dan berkongsi bangunan yang sama di Klinik Kesihatan Kulai Besar yang beralamat Batu 19, Jalan Air Hitam, Kulai. Justeru itu, daerah Kulai amat memerlukan sebuah klinik kesihatan yang baharu serta Pejabat Kesihatan Daerah Kulai perlu mempunyai bangunannya sendiri memandangkan populasi warga Kulai telah mencatat 300,000 orang.

Saya difahamkan terdapat dua bidang tanah yang dirizabkan untuk KKM iaitu di PTD 105166, Mukim Senai, daerah Kulai, Johor yang seluas 4.99 ekar untuk tapak klinik dan di Lot 24035, Mukim Kulai, daerah Kulai, Johor yang seluas 1.228 ekar untuk tapak Pejabat Kesihatan Daerah Kulai.

Soalan saya kepada Kementerian Kesihatan Malaysia adalah seperti berikut:

- (i) senaraikan tanah rizab KKM di daerah Kulai. Apakah perkembangan terkini terhadap permohonan bidang tanah untuk klinik kesihatan di PTD 105166, Mukim Senai dan di Lot 24035, Mukim Kulai, daerah Kulai, negeri Johor untuk tapak Pejabat Kesihatan Daerah Kulai;
- (ii) pembinaan klinik kesihatan yang baharu diperlukan di daerah Kulai khususnya di Senai. Apakah pihak KKM mempunyai perancangan membina sebuah klinik kesihatan yang baharu di sana?;
- (iii) Klinik Kesihatan Kulai Besar dan Klinik Kesihatan Kulai Bukit Liki menampung berapa orang pelanggan setiap hari? Kapasiti maksima untuk dua klinik kesihatan ini adalah berapa orang pelanggan setiap hari?; dan
- (iv) rancangan Kementerian Kesihatan Malaysia untuk membina Pejabat Kesihatan Daerah Kulai yang masih tidak mempunyai bangunan sendiri sedangkan perkara tersebut satu keperluan.

Sekian. Terima kasih.

2.37 ptg.

Timbalan Menteri Kesihatan I [Dato' Dr. Haji Noor Azmi bin Ghazali]:

Terima kasih Tuan Yang di-Pertua. Terima kasih Yang Berhormat Kulai. Tuan Yang di-Pertua, KKM sentiasa memantau fasiliti-fasiliti di bawah kementerian, termasuklah keperluan bagi membina sesebuah klinik kesihatan tertakluk kepada ketersediaan tapak yang sesuai dan peruntukan kewangan kerajaan. Buat masa ini, terdapat 10 tapak yang mempunyai fasiliti Kementerian Kesihatan Malaysia (KKM) di Daerah Kulai seperti berikut:

- (i) MLO 5504, Tapak Hospital Temenggong Seri Maharaja Tun Ibrahim (52 ekar);
- (ii) MLO 5504, Tapak Klinik Kesihatan Kulai Besar (2.999 ekar);
- (iii) Lot 134, Tapak Klinik Kesihatan Kulai (2.999 ekar);
- (iv) MLO 4943, Tapak Klinik Kesihatan Senai (0.225 ekar);
- (v) MLO 3621, Tapak Klinik Desa Ulu Choh (0.2755);
- (vi) PTD 6274, Tapak Klinik Desa Kelapa Sawit (0.358 ekar);
- (vii) PTD 6433, Tapak Klinik Desa Sedenak (0.381 ekar);
- (viii) Lot 38, Tapak Klinik Desa Air Bemban (0.381 ekar);
- (ix) PTD 7962, Tapak Klinik Desa Kampung Bukit Batu (0.510 ekar); dan
- (x) Lot 5205 Tapak Klinik Desa Saleng (0.287 ekar).

Permohonan bagi tanah Lot PTD 105166, Mukim Senai untuk tujuan pembinaan klinik kesihatan telah dikemukakan kepada Pejabat Tanah dan Daerah Kulai pada 19 Februari 2020. Walau bagaimanapun, permohonan tersebut masih dalam tindakan Pejabat Tanah dan Daerah Kulai dan belum ada keputusan mengenainya. Manakala permohonan bagi tanah Lot 24035 Mukim Kulai untuk tujuan pembinaan Pejabat Kesihatan Daerah telah ditolak oleh Pejabat Tanah dan Daerah Kulai melalui satu surat bertarikh 24 Mei 2021.

Walaupun bagaimanapun, tapak tersebut telah dirizabkan bagi tujuan kesihatan di bawah kawalan Setiausaha Kerajaan Negeri Johor dan diselenggarakan oleh Pengarah Kesihatan Negeri Johor.

Berhubung perancangan pembinaan klinik kesihatan yang baharu, Mukim Senai mempunyai populasi penduduk sekitar 68,000 orang dengan kedatangan harian seramai 180 orang pesakit di Klinik Kesihatan Senai. KKM mengambil maklum akan kekangan ruang di klinik kesihatan tersebut dan akan memohon pembinaan klinik kesihatan yang baharu di dalam *Rolling Plan* yang akan datang di bawah Rancangan Malaysia Kedua Belas (RMKe-12) tertakluk kepada status hak milikan Lot PTD 105166, Mukim Senai.

Manakala, Klinik Kesihatan Kulai Besar adalah merupakan klinik kesihatan 'Jenis 3' yang telah beroperasi sejak tahun 2003 dengan kedatangan harian hampir 860 orang pesakit. Klinik Kesihatan Kulai yang telah beroperasi sejak tahun 1960 pula menggunakan fasiliti lama yang menerima kedatangan pesakit hampir 698 pesakit sehari. Pihak KKM mengambil maklum dengan kesesakan dan kekangan ruang di kedua-dua fasiliti kesihatan dengan jumlah kedatangan pesakit harian yang tinggi.

Seperti mana pihak Yang Berhormat sedia maklum, Pejabat Kesihatan Daerah Kulai buat masa ini beroperasi di bangunan Klinik Kesihatan Kulai Besar. Tanah yang dirizabkan untuk KKM di Lot 24035, Mukim Kulai, Daerah Kulai, negeri Johor yang seluas 1.228 ekar adalah terlalu kecil untuk menempatkan sebuah Pejabat Kesihatan Daerah. Sehubungan dengan itu, pihak KKM sedang mengenal pasti tapak lain dengan keluasan tapak yang bersesuaian untuk menempatkan Pejabat Kesihatan Daerah Kulai. Sekian, terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri Kesihatan. Ahli-ahli Yang Berhormat, Mesyuarat Kamar Khas hari ini ditangguhkan sehingga hari Selasa, 7 Disember 2021, jam 2.30 petang. Terima kasih Ahli-ahli Yang Berhormat.

[Kamar Khas ditangguhkan pada pukul 2.41 petang]